


TEZAU LITURGIC

21 OCTOMBRIE

SLUJBA SF. IERARH ILARION, MITROPOLITUL KIEVULUI ȘI ÎNTREGII RUSII, DE LA PECERSKA



MOSCOVA, 2000



**Мѣсяца октоврїя въ 21-й день
Память преподобнаго отца нашего
Иларїона Митрополита Кїевскаго
схимника Печерскаго монастыря,
егоже святыя мощи въ Дальнихъ
Пещерахъ покоятся**

На велицѣй вечерни

По предначинательнѣмъ псалмѣ, поемъ
„Блаженъ мужъ“, первый антифонъ. На
„Господи, воззвахъ“, стихиры на 8, 4 во гласъ 6-
й, подобенъ „Вся отложивше...“

Всю надежду спасенїя возложивъ на всесвѣтлую
благодать Божїю, удалися міра Иларїонъ, вся
попеченїя мірская отлагая, и даже епископскїя
власти отрицаяся, да безпреткновенно
прилепится житїю монашескому, смиренїемъ и
послушанїемъ обложився и всякаго богатства
обнажився. Сице, закону любви себе обручивъ,
молится о душахъ нашихъ. Дважды.

Во глубины духовныя Писанїй погружаяся,
просвѣщенїя ума святой Иларїонъ сподобися,
яко да уразумѣеть судьбы невѣдомыя Божїя,
имиже Вышней спасенїе устрои падшаго
человѣка; тѣмже умными очима зряше дѣла
Бога, родъ христіанскїй просвѣщающаго Своею
всеблестательною благодатїю, въ рай возвращая

ихъ.

Христа Владыки своего подражая, Иларіонъ честный крестъ Его взять яко брѣмя благое и иго легкое весьма, послѣдуя Ему по пути прямому и узкому, ведущему въ царство вышнее; дружина же святыхъ и ангельстїи чини введоша и въ чертоги небесныя, идѣже непрестанно хваля Пресвятую Троицу, молится о душахъ нашихъ.

И иныя четыре стїхиры во гласъ 8-й,
подобень: „О, преславнаго чудесе!“

О, преславнаго чудесе! На сѣдалищи восшедъ великаго Кіева, и закону Христовувся научивъ, Иларіонъ понизи себе, мірскую гордыню всю отвергъ, и во святыя пещеры убѣгая яко къ пристанищу среди житейскихъ буръ, яко въ броня схимою одѣяся и съ супостатомъ рода нашего брася. Дважды.

О, преславнаго чудесе! Ни санъ высокій, ниже благоволеніе княжеское отъ благочестиваго намѣренія уклониша Иларіона преподобнаго; тѣмже спасеніи души своея внимая, потщася въ пещеры прибѣгнути, идѣже Духомъ укрѣпивъ себе, душу свою освященную въ руку Зиждителя своего предаде.

О, преславнаго чудесе! Въ знаменіе благоволенія Своего и яко Тому благоугодна, Богъ соблюдѣ тѣло Иларіона тлѣнію непричастно и

скорошествію време неумолимому неприкосновенно; тѣмже, о людіе Христовы Руси, вельми возликуимъ яко и до днесъ о сокровищи семъ богатствуемъ.

Слава... Самогласень, гласъ 2-й:

Всѣхъ поучивъ спасенія искати благодатію, міра суетнаго прахъ отъ себе оттряслъ еси, ревностію пламенея, труды подъялъ еси подвижническія, блаженне отче Иларіоне, и со Ангелы безплотными бесѣдуя, аще и въ тѣлеси плотски сый, духовныхъ удостоился еси видѣній. Сего ради лукавыхъ отрини нападенія, ищущихъ погибели душъ нашихъ, и не престай моляся дароватися веліей милости вѣрою творящимъ святую память твою.

И ныне... Богородичень догматикъ тогоже гласа.

Прейде сѣнь законная, благодати пришедши: якоже бо купина не стараше опаляема, тако Дѣва родила еси и Дѣва пребыла еси. Вмѣсто столпа огненнаго праведное возсія Солнце, вмѣсто Моисея - Христось, спасеніе душъ нашихъ.

Входъ. Прокимень дне. Пареміи преподобному три:

Премудрости Соломоновы чтение (глава 3):

Праведныхъ души въ руцѣ Божіей, и не прикоснется ихъ мука. Непщевани быша въ очесехъ безумныхъ умрѣти, и вмѣнися озлобленіе исходъ ихъ, и еже отъ насъ шествіе сокрушеніе, они же суть въ мирѣ. Ибо предъ лицемъ челоуѣческимъ аще и муку пріимуть, упованіе ихъ безсмертія исполнено. И вмалѣ наказани бывше, великими благодѣтельствовани будутъ, яко Богъ искуси я, и обрѣте ихъ достойны Себѣ. Яко злато въ горнилѣ искуси ихъ, и яко всеплодіе жертвенное пріяте я. И во время посѣщенія ихъ возсіяють, и яко искры по стеблію потекутъ. Судятъ языкомъ, и обладають людьми, и воцарится Господь въ нихъ во вѣки. Надѣющіися Нань разумѣють истину, и вѣрніи въ любви пребудутъ Ему: яко благодать и милость въ преподобныхъ Его, и посѣщеніе во избранныхъ Его.

Премудрости Соломоновы чтение (главы 5 и 6):

Праведницы во вѣки живутъ, и въ Господѣ мзда ихъ, и попеченіе ихъ у Вышняго. Сего ради пріимуть царствіе благолѣпія и вѣнецъ доброты отъ руки Господни: зане дѣсницею покрыетъ я и мышцею защититъ ихъ. Пріиметъ всеоружіе рвеніе свое, и вооружитъ тварь въ мечь врагомъ. Облечется въ броня правды, и

возложитъ шлемъ, судъ нелицемѣренъ. Пріиметь щитъ непобѣдимый преподобіе. Поостритъ же напрасный гнѣвъ во оружіе: споборетъ же съ нимъ міръ на безумныя. Пойдутъ праволучныя стрѣлы молниины, и яко от благокругла лука облаков, на намерение полетятъ. И отъ каменомѣтныя ярости исполнь падут грады. Вознегодуетъ на нихъ вода морская, рѣки же потопятъ я нагло. Сопротивъ станетъ имъ духъ силы и яко вихоръ развѣетъ ихъ, и опустошитъ всю землю беззаконіе, и злодейство превратитъ престолы сильныхъ. Слышите убо, царіе, и разумѣйте, навыкните судіи концевъ зѣмли. Внушите держаціи множества и гордяціися о народехъ языковъ, яко дана есть отъ Господа держава вамъ и сила отъ Вышняго.

Премудрости Соломоновы чтеніе (главы 4 и 5): Праведникъ аще постигнетъ скончатися, въ покои будетъ. Осудитъ же праведникъ умираяй живуція нечестивыя: узрятъ бо кончину праведнаго и не разумѣють, что совѣщаша о немъ. Яко повержетъ Господь нечестивыя безгласны ниць и поколеблетъ ихъ отъ основаній, и до послѣдняго исчезнутъ въ болѣзни, и память ихъ погибнетъ. Пріидутъ бо въ помышленіе согрѣшеній своихъ ужасни, и обличитъ ихъ сопротивъ беззаконія ихъ. Тогда

станеть въ дерзновеніи мнозѣ праведникъ предъ
лицемъ оскорбившихъ его и отметающихъ труды
его. Видѣвше же его, смятутся страхомъ
многимъ и ужаснутся о преславномъ спасеніи
его. Рекутъ бо въ себѣ кающесея, и въ тѣснотѣ
духа воздохнуть, и рекутъ: сей бе, егоже
имѣхомъ нѣкогда въ посмѣхъ, и въ притчу
поношенія, безумніи, житіе его вмѣнихомъ
неистово, и кончину его безчестну. Како
вмѣнися въ сынехъ Божіихъ, и во святыхъ жребій
Его есть. Убо заблудихомъ от пути истиннаго, и
правды свѣтъ не облиста намъ, и солнце не
возсія намъ. Беззаконныхъ исполнихомся стезь
и погибели, и ходихомъ стези непроходны, пути
же Господня не разумѣхомъ.

На литіи, стихира храма, таже стихирѣ сія,
самогласны во гласъ 3-й:

Приидите, лики монашестіи, со іерархи нашими
составимъ ликъ, да почтемъ Иларіона
досточестнаго, пресвѣтлаго святителя и
богоноснаго подвижника — безмолвіемъ бо души
умъ очистивъ, Духа Святаго органъ бысть и
благодатію божественною исполнися, всѣхъ
подвигъ искати Бисера драгоцѣннѣйшаго,
презирати же ложная духовная. Нынѣ же, въ
вышнихъ наслаждаяся славою, безпрестани
молится за души наша.

Гласъ 8-й, Слава:

Пѣсньми священными возвеличимъ Иларіона блаженнаго, иже честно схиму великую и святую носивъ, нынѣ со Ангелы жительствуетъ, ихже нравы облечеса, и съ ними непрестанное хваленіе возноситъ предъ престоломъ Вышняго, моляся и о радостию празднующихъ на земли святую память его.

Гласъ тойже, Богородичен:

Владычице, пріими молитвы рабъ Твоихъ, и избави насъ отъ всякія нужды и печали.

На стиховнѣ стихиры.

Гласъ 2-й, подобень: „Егда отъ древа...“

Первый въ христіанѣхъ на Руси благодать архіерейскую пріявый, просія Иларіонъ яко пресвѣтлое свѣтило, свѣтомъ благодати нетварніа блистаяся, и люди омраченныя изводя отъ тьмы языческія, научи ихъ ликовнѣ вопіяти: слава снисхожденію Твоему, Человѣколюбче!

Стихъ: Честна предъ Господемъ смерть преподобныхъ Его.

Христовы люди избранныя, свѣтомъ Христовымъ удалилъ еси сѣтей бѣсовъ имже иногда кланяхуса, Иларіоне, сего ради тобою наученніи презрѣша Перуна проклятаго, Велеса гнуснаго и вся прочая, вопіюще единому истинному Богу: слава Тебѣ, Человѣколюбче!

Стихъ: Блаженъ мужъ бояйся Господа, въ заповѣдехъ Его восхощетъ зѣло.

Любовію къ Богу сердцемъ горя, душу честную имѣяй просвѣщенну ти благодатию Его, житіе монашеское подъялъ еси яко свѣтильникъ златъ, о пречудне отче Иларіоне, егоже яко масломъ пречистымъ всякою добродѣтелію исполнилъ еси; тѣмже доброчестіемъ твоимъ выну воздвизаеши насъ вопити: слава Христу Человѣколюбцу!

Слава... Самогласенъ во 4-й гласъ:

Огнь подвижничества возгнѣщъ, терніе искоренилъ еси и волчцы страстей плоти и духа, и сѣмя добродѣтелей въ душу твою возрастилъ еси, о преподобне Иларіоне, ибо благодать являя словомъ и дѣломъ, въ жизни обрѣтаемую за Христа единаго, открылся еси всѣмъ монашествующимъ образъ и вѣрнымъ свѣтоводитель ко спасенію. Сего ради, священне отче, не престай моляся предъ престоломъ Христа, да просвѣтитъ умы наша свѣтомъ знанія божественнаго.

И ныне... Богородиченъ гласа.

Творецъ и Избавитель мой, Пречистая, Христось Господь, изъ Твоихъ ложеснъ прошедь, въ мя оболкійся, первыя клятвы Адама свободы. Тѣмже Ти, Всечистая, яко Божіи Матери же и Дѣвѣ воистинну, вопиемъ немолчно: радуйся,

Ангельски, радуйся, Владычице, предстательство и покрове, и спасение душъ нашихъ.

По благословеніи хлѣбовъ, поемъ святаго тропарь во гласъ 1-й.

Воистину достойно Иларіонъ назвася, нравомъ сый миренъ и кротокъ по имени своему, кроткому Господу Иисусу симъ благоугоденъ бывъ: Того моли за ны, тебе служащия. Дважды. По симъ „Богородице Дѣво“ единожды.

На утрени

На Богъ Господь... тропарь Святаго дважды. Слава... и нынѣ... Богородиченъ воскресенъ по гласу.

Гавріилу провѣщавшу тебѣ: Дѣво, радуйся! Со гласомъ воплощашеся всѣхъ Владыка въ Тебѣ святѣмъ кивотѣ, якоже рече праведный Давидъ; явилася еси ширшая Небесъ, поносивши Зиждителя Твоего. Слава Всельшемуся въ Тя, слава Прошедшему изъ Тебе, слава Свободившему насъ Рождествомъ Твоимъ.

По первомъ стихословіи, сѣдаленъ, гласъ 1-й, подобенъ: „Гробъ Твой, Спасе...“

Вкупѣ со святыми въ пещерахъ погребенъ, тѣло твое всехъ Спасомъ сохраненно, нетлѣнно

пребысть, Иларіоне, въ знаменіе воскрешенію мертвымъ обѣтовенное. Тѣмже съ тобою восхваляемъ Христа, ада потребителя, воставшаго отъ мертвыхъ, Иже въ день послѣдній возставитъ вся. Дважды.

Слава... и нынѣ... Богородичень:
Упованіе христіанъ, Пресвятая Дѣво, Егоже родила еси Бога, паче ума и слова, непрестанно моли о воспѣвающихъ Тя, подати оставленіе грѣховъ нашихъ всѣхъ, и исправленіе житія, вѣрою и любовію славящихъ Тя.

По второмъ стихословіи сѣдалень, гласъ 4-й,
подобень: „Скоро предвари...“

Жизнь свою Христу предавъ, священне, въ пещеру вселился еси и добръ брався яко воин Божій доблій, побѣдительнѣ въ селенія небесныя прешель еси, отонудуже выну проливаеши обиліе исцѣленій душамъ и тѣлесемъ нашимъ. Дважды.

Слава... и нынѣ, Богородичень:
Дѣво Всенепорочная, яже пресущнаго Бога рождшая, со безплотными Того непрестанно моли, оставленіе прегрѣшеній, и исправленіе житія дати намъ прежде конца, вѣрою и любовію поющимъ тя по долгу, едина Всепѣтая.

Полвелей и величаніе:

Ублажаемъ тя, преподобне отче Иларіоне, и чтимъ святую память твою, наставниче монаховъ и собесѣдниче ангеловъ.

Псаломъ избранный

1. Терпя, потерпѣхъ Господа, и внятъ ми, и услыша молитву мою.
2. Постави на камени нозѣ мои, и исправи стопы моя.
3. Се удалихся бѣгая, и водворихся въ пустыни. и прочая.

По Полвелеи, сѣдалень гласъ 8-й, подобень „Мудрости“

Въ поприще вшедъ спасенія, правовѣрный Иларіонъ, и о благочестіи тризнававъ до конца, вѣнецъ получи побѣды отъ Подвигоположника Христа: вся бо борющія низложилъ, побѣду приять, отъ враговъ несломимъ бывъ. Яко волею изливаетъ елей исцѣлений на просящія вѣрою, вкупѣ ему восписуемъ: моли присно Христа Бога даровати прощеніе грѣховъ празднующимъ любовію святую память твою. Дважды.

Слава... и нынѣ... Богородичень:

Въ напасти многоплетенныя впадъ, отъ врагъ видимыхъ и невидимыхъ, бурю одержимъ безчисленныхъ согрѣшеній моихъ, яко къ

теплому заступленію и покрову моему, Чистая, ко пристанищу притекаю Твояя благодати. Тѣмже, Пречистая, Иже изъ Тебе Воплощенному безъ сѣмене, молися прилѣжно о всѣхъ рабѣхъ Твоихъ, непрестанно молящихъ Ти ся, Богородице Пречистая, присно умолящи Его согрѣшеній оставленія даровати воспѣвающимъ достойно славу Твою.

Степенна, первый антифонъ 4-го гласа. Прокімень гласъ 4: Честна предъ Господемъ смерть преподобныхъ Его.

Стихъ: Что воздамъ Господеви о всѣхъ яже воздаде ми.

Всякое дыханіе да хвалитъ Господа: Отъ Матѳеа святаго Еваггеліа чтеніе (зачало 43). По 50-мъ Псалмѣ, стихира гласъ 6-й. Не Велесомъ лжебогомъ древо души твояя напаяшеса, ниже безсиліемъ Перуна проклятаго, плодъ душа твоя, Иларіоне, принесе, но благодатію Божіею, напаялъ еси душу твою, слезы покаянія беспрестани источая, и силою Его плодъ добрый принеслъ еси всѣму Тѣлу Христову, егоже въ наслажденіи духовнемъ причащаемся, Иисусу божественному Земледѣлтелю вѣрою покланяющеса.

Канонъ молебный Пресвятѣй Богородицѣ (Параклисъ) на 6 со ирмосомъ, таже Святому на 8, егоже краегранесіе „Законъ соблюдая благодать Иларіонъ обрѣте“, во гласъ 7-й.

Пѣснь 1

Ирмосъ: Отъ струй Чермнаго, стѣну Сотворшему людемъ, и покрывшему глубиною Фараона со всевоинствомъ, поимъ Господеви, славно бо прославися.

Господа вѣдяще Бога Израилева, яко Бога нашего, и святымъ Его предстательствуемы преподобнымъ Иларіономъ, тьмы идолюбѣсія и демономъ служенія убѣжимъ, яко Египта языческа.

Повелѣніемъ Моисеовымъ Израиль оставивъ Египеть, въ землю обѣтованную бѣже, новый же Израиль, Русь Христова, Иларіономъ наученная, вѣру ложную остави и пристанище надежное во Христа обрѣте.

Всякъ языкъ благословить Господа, благодать обновленія всѣмъ принесшаго, среди же нихъ Русь гласъ возвышаетъ въ славословіихъ, Бога возхваляючи славно Прославившагося.

Богородичень: Дщи фараоня взятъ яко своего младенца законодателя Моисеа, обрѣтши того плавающа въ водахъ Нила, Марія же воистину роди Спасителя душъ нашихъ.

ПѢСНЬ 3

Ирмось: Въ православной вѣрѣ исповѣданія утверди мя, Господи, да не подвигнетъ мя врагъ до конца.

Несокрушима крѣпость святыя вѣры твоея, Господи, на нейже Иларіонъ насъ утверди. Да не подвижетесь во исповѣданіи вашемъ, русскіе людіе, да не упразднится вами ученіе святаго Иларіона!

Благодать Спасителемъ намъ дадесе, сего ради въ Православіи твердо стойте, Иларіонъ зоветъ. Ходатайствы преподобнаго неподвижимы есмы врага навѣтами.

Богородичень: Вышши естъ честію всѣхъ ангельскихъ чиновъ Марія, Матерь Христа Бога и Господа нашего.

Сѣдалень гласъ 3.

Подобенъ „Божественною вѣрою“:

Яко неугасимый свѣтильникъ намъ явился, сіяй свѣтомъ духовнымъ, Бога, обитель внутрь тебе сотворшаго, богоносне Иларіоне, сего ради умы наша божественными ученіи твоими воспламеняеши, преподобне отче, моли Христа Бога даровати намъ велію милость. Дважды.

Слава... и нынѣ... Богородичень:

Божественнаго не отлучився естества, плоть пріимъ же во утробѣ Твоей, Единый Господь

Богъ пребысть и человекъ, Иже и по рождествѣ сохрани тя Дѣву Матерь Свою, Пренепорочная, якоже и прежде рождества. Того моли прилежно даровати намъ велию милость.

Пѣснь 4

Ирмосъ: Небеса покрыла естъ добродѣтель Твоя, Господи, и Твоего хваленія вся исполнилъ еси: Слава силѣ Твоей, Человѣколюбче!

Всякъ языкъ Господа хвалить, Избавителя нашего, за милость Его; и Иларіонъ Русь научи пѣти Того яко крѣпка и человеклюбца.

Да восхвалимъ нынѣ Иларіона научившаго насъ въ началѣ словами, по томъ же и образомъ житія своего, слѣдовати Господу Іисусу Искупителю нашему яко человеклюбца.

Благодати исполнь, Иларіонъ намъ яви скрижали благочестія, имиже поживше, Богу благоугодимъ поюще: слава Тебѣ, Человѣколюбче!

Богородичень: Въ превыспренняя селенія своя Матерь Си возносящу Господу, вси благоговѣніемъ на Ню взирающе зовяху: слава силѣ Твоей, Человѣколюбче!

Пѣснь 5

Ирмосъ: Утренюетъ духъ мой къ Тебѣ, Боже, зане свѣтъ еси, и Твоя повелѣнія быша исцѣленія

работъ Твоимъ, Человѣколюбче.

Раны исцѣляя идолюбѣсія нашего, подъ свѣтомъ Солнца праведнаго Иларіонъ прострѣ я, егоже спасительная поученія всѣмъ недугамъ нашимъ приносятъ исцѣленіе.

Спасительными повелѣньми Христа Бога дарова намъ Иларіонъ сокровище драгоцѣннѣйшее, имже освобождаемся отъ работы вражія.

Въ язычествѣмъ заблужденіи коснящая Русь пробудися о зарѣ новаго дне христіанства, егоже Христосъ Человѣколюбецъ святыми Владимиромъ и Иларіономъ возсія.

Богородичень: Въ восхожденіи солнца, въ полудни и въ ноци пришествіи, вси вѣрніи Матерь Божию хвалите яко человѣколюбиву.

Пѣснь 6

Ирмосъ: Плавающаго въ молвѣ житейскихъ попеченій, съ кораблемъ потопляема грѣхи, и душетлѣному звѣрю примѣтаема, яко Іона, Христе, вопію Ти: изъ смертоносныя глубины возведи мя!

Бурею шатаюся моря житейскаго, преподобне, съ кораблемъ души твоя потопляема, вся отложилъ еси попеченія и ко пристанищу пещерь приплылъ еси, зовя: изъ смертоносныя глубины возведи мя!

Въ прибѣжищи пещерь, яко въ тихомъ

пристанищи, миръ обрѣлъ еси души твоей, святе, душетленного убѣгая звѣря, ищущаго насъ низвлеци во глубину смертоносную!

Святе Иларіоне, святительскія одѣжды на монашеское премѣнилъ еси вретнице, егоже Духъ Святыи подунувъ яко вѣтрило, стремливо тя пренесе сквозъ глубину грѣха смертоносную.

Богородичень: Се нынѣ вси волнами житейскаго моря обуреваеміи и возмущаеміи, возопіимъ къ Матери бурю Укротившаго: Госпоже, избави ны отъ смертоносныхъ глубины!

Кондакъ, гласъ 2.

Священную воспримъ схиму, и великое ангельское житіе монашескаго званія, вторицею суетнаго міра отвергаяся, всячески потрудился еси, преподобне Иларіоне, да дѣломъ исполниши обѣты твоя, яко да по имени образа священнаго твоего поживеши: сего ради ты почитаемъ и благословимъ.

Ікосъ:

Ангель во плоти явился еси, преблаженнѣйшии и преславнѣи Иларіоне, яко ангельскимъ добрословесіемъ представилъ еси намъ словеса спасительная, имиже наставляемы къ вышшему житію, сокрушенно зовемъ ти:

Радуйся, Россійскій свѣтильниче;

радуйся, Кіевській фаросе!
Радуйся, наставниче ко спасенію намъ;
радуйся, духовныхъ ученій усто медоточная!
Радуйся, небесныя премудрости сосуде;
радуйся, писаній разумѣтельное сокровище!
Радуйся, ревностнѣйшій служителю Христовъ;
радуйся, подвижникомъ преподобія образе!
Радуйся, отъ страстей злыхъ свободителю;
радуйся, божественный намъ наставниче!
Радуйся, райскій жителю;
радуйся, отче нашъ Иларіоне преблаженне!

Пѣснь 7

Ирмосъ: Мучителява повелѣнія отроцы не послушаша, печи не убояшася, Богу же воспѣваху: отцевъ Боже, благословенъ еси!
Прибѣжище искалъ еси въ безмолвіи пещерь, преподобне отче, идѣже наученъ былъ еси всѣмъ сердцемъ воспѣвати: отцевъ нашихъ Боже, благословенъ еси!
Господа присно спасающаго всегда вѣруя, святе, посредѣ печи искушеній яко юноши воспѣвалъ еси: отцевъ нашихъ Боже, благословенъ еси!
Княжестѣй воли покоряся, архіерейское восприялъ еси достоинство, Иларіоне, егоже позже отложилъ еси, Бога отцевъ нашихъ послушая.

Богородичень: Яко въ пламени стояще пещи похотей нашихъ, къ Богу обратившеся возопимъ: великаго совѣта Ангеле, Пречистою Твоею Матерію спаси насъ!

Пѣснь 8

Ирмосъ: Страшнаго херувімомъ и Чуднаго серафімомъ, и міру Творца, священницы и раби, и дуси праведныхъ, пойте, благословите и превозносите Его во вѣки!

Во одѣждѣ праведна первосвященника жертву приношалъ еси хваленія міра Творцу, Иларіоне; нынѣ же прославляеши Его на небесѣхъ со херувими и серафими.

Воистину праведна служителя Всеvyšняго показался еси, преподобне отче, ибо послушливъ бивъ гласу Того, вся оставилъ еси, яко да восхваляеши его въ превыспренняя съ чинми небесными.

Вся страсти чловѣческія отъ Бога отводящія отринулъ еси, праведне, ангельское житіе еще во плоти бивъ пріобреть. Тѣмже и со ангелы восхваляеши Христа въ превыспренняя во вѣки.

Троичень: Святыя Троицы догмать опредѣляя: Отца безначальнаго, Сына едиnorodнаго и Има равночестнаго Духа, — благоговѣйно таинству несказанному предстояще, Божественную Троицу изрядно величаемъ во вся вѣки.

Богородичень: Преславно мѣсто идѣже Матерь Создателя нашего близъ престола Его стоитъ, окружаема чиньми святыхъ и ангельскими вои, иже вся благоговѣніемъ ю величаютъ изрядно во вся вѣки.

Пѣснь 9

Ирмосъ: Тя скинію святую, одушевленный ковчегъ, юже Премудрость Божія созда, истинную Богородицу пѣсньми величаемъ. Преисполненное благодати Божія тѣло твое священное нетлѣнно сохранися, въ знаменіе всѣмъ яко веліе благоволеніе Божіе къ людемъ праведнымъ.

Благоговѣніемъ веліимъ весь міръ предъ святыми Печерскими стоимъ, ихже мощи святыя яко свѣтильники насъ озаряють свѣтомъ невидимымъ Божія благодати.

Приидите, люди вси христіанстіи, да вкупѣ почтимъ мощи святыя Иларіона преподобнаго, иже ко благодати архіерейстѣй благодать монашескую добръ приложи.

Богородичень: Приснодѣва еси, Мати Слова, Всечистая и Пренепорочная; ибо утробу Твою тлѣнію непричастну сохрани, душу же Твою непорочну всяко.

Свѣтиленъ, подобень: „Небо звѣздами...“:
Преподобне Иларіоне, сіяеши яко пресвѣтлая
звѣзда въ средь чуднаго созвѣздія святыхъ
Печерскихъ; сего ради просвѣти души наша
омраченныя, благосіянми Христа Бога
нашего. Дважды.

Богородичень:

О, Богородице, Мати Христа Бога нашего,
простри твою материнскую руку и спаси ны отъ
бездны грѣховъ и беззаконій нашихъ, яко
воистину въ паденіи прегоркомъ пребываемъ.

На хвалитѣхъ стіхиры 4, во гласъ 1,
подобень: „Небесныхъ чиновъ...“

Церкве Христовы радovanje, велій заступниче
града Кіева — градовъ русскихъ матере, Святая
Руси украшеніе, молитвенниче душъ нашихъ:
непрестанно Бога умоляй, Иларіоне, еже спасти
ны! Дважды.

Необорима имѣемъ тя свыше споручника, ибо
моленія о насъ приносиши предъ престоломъ
Триединого Бога, пламеннѣ умоляя Его, еже
спасти ны!

Вси нынѣ притецемъ къ святымъ мощемъ
преподобнаго отца: тѣло бо того непричастно
тлѣнію, благодать изливаетъ яко щедръ
источникъ; отъ негоже почерпающе вѣрою,
исцѣленій сподобляемся.

Слава: самогласенъ во гласъ 8-й:
Отче Иларіоне богоносне, повѣленіемъ
праведнаго Ярослава послужилъ еси
архипастырѣ града Кіева, новымъ овцамъ
словеснаго стада Христова пасяй, имже
положенія заповѣдей и благодати дѣянія уяснилъ
еси, вся научая вѣрою покорятися словесемъ
Всесильнаго Бога образомъ житія, во отверженіи
всѣхъ мірскихъ соблазновъ, въ непрестаннѣмъ же
бореніи противу всѣхъ страстей спасеніе
получилъ еси благодатію Божією.

И нынѣ: Богородиченъ:
Все упованіе мое на тя возлагаю, Мати Божія,
сохрани мя подъ кровомъ твоимъ.

Великое славословіе. Тропарі. Ектеніи.
Отпустъ. Часъ первый.

На литургіи

На „Блажены...“ канона святаго пѣсни 3 и 6, 8
тропарей.

Прокимень гласъ 7: Честна предъ Господемъ
смерть преподобныхъ Его.

Стихъ: Что воздамъ Господеви о всѣхъ, яже
воздаде ми?

Посланіе къ Галатомъ, зачало 213.

Аллилуія, гласъ 8: Блаженъ мужъ бояйся

Господа, въ заповѣдехъ Его восхощетъ зѣло.
Стихъ: Сильно на земли будетъ сѣмя его.
Евангеліе отъ Матѳеа, зачало 43.
Причастенъ: Въ память вѣчную будетъ
праведникъ, отъ слуха зла не убоится.

